

**APEC pandang serius isu jaminan makanan**  
**Utusan Online**  
**Januari 19, 2012**

KUALA LUMPUR 18 Jan. - Kerjasama Ekonomi Asia Pasifik (APEC) memandang serius isu jaminan makanan dengan memperkenalkan beberapa langkah bagi mengatasi masalah tersebut.

Pengarah Eksekutif Sekretariat APEC, Datuk Muhamad Noor Yacob berkata, langkah pertama yang di ambil adalah mengadakan kerjasama antara kerajaan dan sektor swasta (PPP).

"Perkara yang akan dilakukan adalah menangani isu lebih tuaian yang biasanya dibazirkan. Antara pendekatan yang diambil adalah penggunaan teknologi yang boleh menjadikan lebih tuaian sebagai makanan.

"Dengan cara itu, ia dapat mengurangkan pembaziran makanan. Selain itu, APEC turut menggabungkan kumpulan kerja dari segi lautan dan perikanan untuk bekerjasama mencari jalan meningkatkan kecekapan nelayan-nelayan kecil," katanya.

Beliau berkata demikian pada perbincangan meja bulat mengenai APEC; Kesimpulan dan Tinjauan Hadapan 2011/2012 di sini hari ini.

Sementara itu, ketika ditanya mengenai langkah beberapa negara yang menghalang eksport makanan apabila berlakunya krisis, Muhamad berkata, APEC tidak dapat menghalang langkah tersebut.

"Apa yang boleh dilakukan pada masa ini adalah meningkatkan ketelusan dalam perdagangan makanan.

"Negara-negara ahli juga diminta untuk tidak melakukan aktiviti menghalang eksport kerana ia akan menyebabkan ketidakseimbangan pada masa hadapan," jelasnya.

Selain itu, dalam usaha mengukuhkan sekuriti makanan, Pengarah Unit Sokongan Polisi APEC, Denis Hew W. Y berkata, mereka sedang menilai polisi-polisi sekuriti makanan bagi kesemua negara ahli.

"Ia perlu dilakukan bagi memahami kesemua polisi tersebut dan mencadangkan polisi atau langkah bersesuaian dengan semua negara ahli untuk menangani sekuriti makanan.

"Kami di peringkat perbincangan dan berharap ia dapat dimuktamadkan sebelum akhir tahun ini.

"Ia harap dapat dibentangkan pada Sidang Kemuncak APEC di Rusia," katanya.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0119&pub=Utusan\\_Malaysia&sec=Ekonomi&pg=ek\\_03.htm](http://www.utusan.com.my/utusan/info.asp?y=2012&dt=0119&pub=Utusan_Malaysia&sec=Ekonomi&pg=ek_03.htm)